

Dumonda Preisig concernent il SCI da l'Administraziun chantunala da taglia

En l'Engiadin'Ota s'accumuleschan ils cas da disposiziuns da taxaziun divergentas (u uscheditg curregidas). Pertutgadas èn principalmain persunas estras che vivan gia dapi blers onns cun lur famiglias en l'Engiadin'Ota e che lavuran savens en il segment da salari bass. Il muster sa sumeglia en singuls cas:

Las persunas estras inoltreschan a temp lur decleraziun da taglia e survegnan lura ina disposiziun da taxaziun che divergescha fermamain da quella e che chaschuna imports da taglia massivamain pli auts. Las persunas pertutgadas intervegnan mintgamai per il pli sezzas, ma savens senza success, tar la cumissaria u il cumissari da taglia taxant, cumbain ch'il sbagl da la correctura è evident. Sco exempels pon vegnir enumeradas las suandantas correcturas da sbagls:

- quintar vitiers il gudogn accessoric ch'era gia vegnì suttamess a la taglia a la funtauna;
- betg reconuscher ils custs da viadi (particularmain en cas da lavur da squadra);
- reconuscher mo ils custs da viadi per il traffic public e betg quels per l'auto privat;
- stritgar senza motiv la dimora durant l'emna;
- betg reconuscher la deducziun per uffants;
- quintar massivamain memia fitg in'abitaziun a l'exteriur;
- e.u.v.

Las persunas pertutgadas han survegnì raschun mintgamai pir cun agid professiunal, cumbain che las cumprovas existivan gia ordavant. Ils custs da l'agid professiunal han las persunas pertutgadas stuì surpigliar sezzas. Per tut quests motivs sa tschantan intginas dumondas fundamentalas davart il sistem da controlla intern (SCI) da l'Administraziun chantunala da taglia en cas da disposiziuns da taxaziun divergentas ed en cas da recurs.

Nus supplitgain perquai la Regenza da responder las suandantas dumondas:

1. Quant aut è stà il dumber da disposiziuns da taxaziun divergentas – repartidas tenor regiun e/u vischnanca – per onn durant ils ultims diesch onns?
2. Quant auta è stada mintgamai la part da las disposiziuns da taxaziun divergentas da persunas estras – repartidas tenor regiun e/u vischnanca – dal total da las disposiziuns da taxaziun divergentas per onn durant ils ultims diesch onns?
3. Relascha ina disposiziun da taxaziun divergenta mo ina cumissaria u in cumissari da taglia sulet u vala il princip da quatter egls?
4. Pertge vegn in recurs respundì da la medema cumissaria resp. dal medem cumissari da taglia? Vala il princip da quatter egls per recurs?
5. Co sa preschenta il SCI dals Cumissariats regiunals da taglia en general?

Cuira, ils 22 d'october 2020

Preisig, Hohl, Weidmann, Baselgia-Brunner, Berweger, Brandenburger, Cahenzli-Philipp, Cantieni, Caviezel (Cuira), Clalüna, Della Cà, Felix, Gartmann-Albin, Hardegger, Hofmann, Horrer, Koch, Lamprecht, Maissen, Müller (Favugn), Natter, Niggli-Mathis (Grüsch), Perl, Pfäffli, Rettich, Ruckstuhl, Rutishauser, Schwärzel, von Ballmoos, Wilhelm, Brändli Capaul, Bürgi-Büchel, Giudicetti, Pajic, Spadarotto, Tomaschett (Cuira), Tscholl